

BOSNA I HERCEGOVINA
Konkurencijsko vijeće



БОСНА И ХЕРЦЕГОВИНА
Конкуренијси савјет

Z A K L J U Č A K
o odbacivanju Prijave koncentracije
privrednog subjekta subjekta Mješoviti holding „Elektroprivreda Republike Srpske“ Matično
preduzeće a.d. Trebinje

Sarajevo,
oktobar, 2018. godine



Broj: UP-04-26-1-009-17/18
Sarajevo, 18.10.2018. godine

Konkurencijsko vijeće Bosne i Hercegovine, na osnovu člana 25. stav (1) tačka e), člana 42. stav (2), a u vezi s članom 12. Zakona o konkurenciji („Službeni glasnik BiH“, broj 48/05, 76/07 i 80/09), a rješavajući po Prijavi koncentracije privrednog subjekta Mješoviti holding „Elektroprivreda Republike Srpske“ Matično preduzeće a.d. Trebinje, ul. Stepe Stepanovića bb, 89 101 Trebinje zaprimljenoj dana 18.04.2018. godine, pod brojem: UP-04-26-1-009-1/18, na 39. (tridesetdevetoj) sjednici održanoj dana 18.10.2018.godine, donijelo je

Z A K L J U Č A K

1. Odbacuje se Prijava koncentracije privrednog subjekta Mješoviti holding „Elektroprivreda Republike Srpske“ Matično preduzeće a.d. Trebinje, ul. Stepe Stepanovića bb, 89 101 Trebinje, radi nepostojanja koncentracije u smislu člana 12. stav (1) Zakona o konkurenciji.
2. Ovaj Zaključak bit će objavljen u „Službenom glasniku BiH“, službenim glasilima entiteta i Brčko distrikta Bosne i Hercegovine.

O b r a z l o ž e n j e

Konkurencijsko vijeće Bosne i Hercegovine (u daljnjem tekstu: Konkurencijsko vijeće) je dana 18.04.2018. godine zaprimilo Prijavu koncentracije privrednog subjekta Mješoviti holding „Elektroprivreda Republike Srpske“ Matično preduzeće a.d. Trebinje, ul. Stepe Stepanovića bb, 89 101 Trebinje (u daljem tekstu: ERS ili Podnosilac prijave) kojom privredni subjekat ERS namjerava započeti saradnju sa privrednim subjektom a.d. „Podolski Mašinstroiteljni Zavod“, ul. Machinostroiteley 23, Podolski, Moskovski region 142115, Ruska Federacija (u tekstu Prijave označen kao Grupa kompanija ZiO) sa ciljem modernizacije i rekonstrukcije energetskih postrojenja privrednog subjekta ERS, a što uključuje rekonstrukciju osnovne i pomoćne opreme, i pružanje inženjerskih usluga, na osnovu Memoranduma o poslovno-tehničkoj saradnji potpisanog dana 03.04.2018. godine u Banja Luci.

Uvidom u podnesenu Prijavu, Konkurencijsko vijeće je utvrdilo da ista nije kompletna u smislu člana 30. stav (1) Zakona o konkurenciji („Službeni glasnik BiH“, broj 48/05, 76/07 i 80/09 (u daljem tekstu: Zakon) i čl. 9 i 11. Odluke o načinu podnošenja prijave i kriterijima za ocjenu koncentracija privrednih subjekata („Službeni glasnik BiH“, broj 34/10), te je od Podnosioca prijave zatražena dopuna iste (akt broj: UP-04-26-1-009-3/18 od dana 25.04.2018. godine).

Podnosilac prijave je dostavio dio tražene dokumentacije, dopisom zaprimljenim pod brojem: UP-04-26-1-009-4/18 dana 14.05.2018. godine, te zatražio produženje roka od 15 (petnaest) dana za dostavljanje preostale dokumentacije.

Konkurencijsko vijeće je aktom broj: UP-04-26-1-009-5/18 od dana 15.05.2018. godine, u skladu sa članom 31. stav (2) Zakona, produžilo rok za dostavu tražene dokumentacije za dodatnih 15 (petnaest) dana.

Podnosilac prijave je dostavio dio dokumentacije, dopisom zaprimljenim pod brojem: UP-04-26-1-009-7/18 dana 19.06.2018.godine.

Konkurencijsko vijeće je aktom broj: UP-04-26-1-009-8/18 od dana 25.06.2018. godine ponovo uputilo zahtjev za dostavu dodatnih podataka.

Nakon zaprimanja zahtjeva za produženjem roka od 15 (petnaest) dana za dostavljanje preostalih podataka broj: UP-04-26-1-009-9/18 od dana 07.07.2018.godine, Konkurencijsko vijeće je u skladu članom 31. stav (2) Zakona, produžilo rok za dostavu traženih podataka za dodatnih 15 (petnaest) dana, aktom broj: UP-04-26-1-009-10/18 od dana 09.07.2018.godine.

Podnosilac prijave je dopisom zaprimljenim pod brojem: UP-04-26-1-009-11/18 od dana 31.07.2018. godine obavijestio Konkurencijsko vijeće da se ponovo obratio privrednom subjeku Grupa kompanija ZiO sa zahtjevom za dostavu traženih podataka od strane Konkurencijskog vijeća.

Konkurencijsko vijeće je aktom broj: UP-04-26-1-009-12/18 od dana 20.09.2018. godine upozorilo Podnosioca prijave da je u smislu člana 31. stav (2) Zakona obavezan u roku od 8 (osam) dana dostaviti traženu dokumentaciju, u suprotnom Konkurencijsko vijeće će smatrati da je odustao od Prijave.

Podnosilac prijave je dostavio traženu dokumentacije, dopisom zaprimljenim pod brojem: UP-04-26-1-009-13/18 dana 28.09.2018. godine.

Konkurencijsko vijeće je dana 09.10.2018. godine (akt broj: UP-04-26-1-009-15/18), Podnosiocu prijave izdalo Potvrdu o prijemu kompletne i uredne prijave, u smislu člana 30. stav (3) Zakona o konkurenciji.

Konkurencijsko vijeće je u postupku ocjene predmetne transakcije utvrdilo slijedeće činjenice:

Prijava je podnesena u roku u smislu člana 16. stav (2) Zakona.

Podnosilac prijave je naveo da zahtjev za ocjenu koncentracije osim u Bosni i Hercegovini neće podnositi nadležnim organima za zaštitu konkurencije u drugim zemljama.

1. Učesnici predmetne transakcije

Učesnici transakcije su privredni subjekti Mješoviti holding „Elektroprivreda Republike Srpske“ Matično preduzeće a.d. Trebinje, ul. Stepe Stepanovića bb, 89 101 Trebinje i a.d. „Podolski Mašinstroiteljni Zavod“, ul. Machinostroiteley 23, Podolski, Moskovski region 142115, Ruska Federacija (u daljem tekstu: Grupa kompanija ZiO).

1.1. Privredni subjekat Mješoviti holding „Elektroprivreda Republike Srpske“ Matično preduzeće a.d. Trebinje

Privredni subjekat Mješoviti holding „Elektroprivreda Republike Srpske“ Matično preduzeće a.d. Trebinje je upisan u sudski registar Okružnog privrednog Suda u Trebinju, pod MBS brojem: 62-05-0026- 11, JIB broj: 4401355450006, sa osnovnim kapitalom od (..)*¹.

Privredni subjekat ERS je dioničko društvo čiji je (..)* vlasnik temeljnog kapitala Republika Srpska.

Pretežne registrovane djelatnosti privrednog subjekta ERS su snabdijevanje i trgovina električnom energijom.

Podnosilac Prijave ostvaruje učešće u vlasničkoj strukturi kapitala sljedećih privrednih subjekata (povezana privredna društva):

- Elektrokrajina a.d. Banja Luka sa (..)* dionica;
- Rite Ugljevik a.d. Ugljevik sa (..)* dionica;

¹ Podaci predstavljaju poslovnu tajnu u smislu člana 38. Zakona o konkurenciji.

- Rite Gacko a.d. Gacko sa (..)* dionica;
- HE na Trebišnjici a.d. Trebinje sa (..)*dionica;
- HE na Drini a.d. Višegrad sa (..)* dionica;
- HE na Vrbasu a.d. Mrkonjić Grad sa (..)*dionica;
- ElektroDoboj a.d. Doboj sa (..)* dionica;
- ElektroBijeljina a.d. Bijeljina sa (..)* dionica;
- Elektrodistribucije Pale a.d. Pale sa (..)*dionica;
- Elektrohercegovina a.d. Trebinje sa (..)*dionica;
- Istraživačko razvojni centar elektroenergetike IRCE a.d. Istočno Sarajevo sa (..)* dionica.

1.1.1. Privredni subjekt a.d. „Podolski Mašinstroiteljni Zavod“ (Grupa kompanija ZiO)

Privredni subjekat a.d. „Podolski Mašinstroiteljni Zavod“ je osnovan i postoji prema zakonima Ruske Federacije, sa glavnim sjedištem na adresi: Ulica Machinostroitelevu 23, Podolsk, Moskovski region, 142115, Rusija, koje zastupa Generalni direktor Daniilenko Viktor Georgievič, upisan je u Jedinstveni državni registar pravnih lica Ruske Federacije pod matičnim brojem: 1025004700456.

Osnovna djelatnost privrednog subjekta Grupa kompanija ZiO je pružanje usluga u oblasti kotlovske opreme i pružanja inženjerskih usluga.

Privredni subjekat Grupa kompanija ZiO na relevantnom tržištu Bosne i Hercegovine posjeduje (..)* vlasničkog udjela u osnovnom kapitalu privrednog subjekta AB Energo-ZiO d.o.o., ul. Njegoševa 1, 89 101 Trebinje.

2. Pravni osnov predmetne transakcije

Pravni osnov transakcije je Memorandum o poslovno-tehničkoj saradnji potpisan između privrednog subjekta ERS i privrednog subjekta Grupa kompanija ZIO, dana 03.04.2018. godine (u daljem tekstu: Memorandum) u Banja Luci koji nije obavezujući za strane koje su ga potpisale, osim Poglavlja 4. („Povjerljivost“).

Učesnici transakcije su se potpisivanjem Memoranduma usaglasili da rade na organizaciji saradnje sa ciljem modernizacije i rekonstrukcije energetskih postrojenja privrednog subjekta ERS, uključujući rekonstrukciju osnovne i pomoćne opreme, i pružanje inženjerskih usluga, sa naročitim osvrtom na rekonstrukciju kotla i produžavanje radnog vijeka istog. Strane su usaglasile formiranje dugoročnog programa i plana rekonstrukcije termoelektrana Gacko i Ugljevik, što će omogućiti optimalan način pristupanja modernizaciji i rekonstrukciji energetskih objekata u sistemu privrednog subjekta ERS. Strane su se usaglasile da će obim poslova po svakoj termoelektrani i cijena radova biti opredijeljeni nakon završene dijagnostike, a sami radovi će se izvršiti u roku od narednih 5 godina. Konačni uslovi saradnje među potpisnicima Memoranduma će biti predmet posebnih sporazuma sklopljenih, kao rezultat pregovora u dobroj namjeri koji utvrđuju prava i obaveze strana.

U sklopu predmetne transakcije privredni subjekat Grupa kompanija ZiO je odlučio da osnuje kompaniju u (..)* vlasništvu na teritoriji Republike Srpske, sa ciljem ostvarivanja potencijala privrednog subjekta Grupa kompanija ZIO i drugih poduzeća za mašingradnju iz Ruske Federaciji, na Balkanskom poluostrvu i kroz koju namjerava da realizuje sve ugovore vezane za modernizaciju termoelektrana koje posluju u sklopu privrednog subjekta ERS.

3. Ocjena predmetne transakcije

Članom 12. Zakona propisano je šta se sve smatra koncentracijom, dok su članom 14. Zakona propisani uslovi pod kojim su učesnici koncentracije obavezni podnijeti prijavu Konkurencijskom vijeću.

Analizom dostavljenih podataka i dokumentacije, Konkurencijsko vijeće je utvrdilo da predmetna transakcija ne ispunjava uslove iz člana 12. stav (1) Zakona, jer potpisani Memorandum ne predstavlja

niti jedan od oblika saradnje koji bi se mogao smatrati koncentracijom u smislu pomenutog člana Zakona. Potpisani Memorandum ne predviđa bilo kakvo spajanje ili pripajanje, sticanje kontrole i ne predstavlja koncentraciju u smislu člana 12. Zakona.

Na osnovu navedenog, privredni subjekt ERS nije bio u obavezi podnijeti prijavu koncentracije, te je Konkurencijsko vijeće odlučilo kao u dispozitivu ovog Zaključka.

4. Administrativna taksa

Podnosilac Prijave na ovaj Zaključak, u skladu sa članom 2. Tarifni broj 108. tačka d) Odluke o visini administrativnih taksi u vezi sa procesnim radnjama pred Konkurencijskim vijećem („Službeni glasnik BiH“, br. 30/06 i 18/11) dužan je platiti administrativnu taksu u ukupnom iznosu od 1.000,00 KM u korist Budžeta institucija Bosne i Hercegovine.

5. Pouka o pravnom lijeku

Protiv ovog Zaključka nije dozvoljena žalba.

Nezadovoljna strana može pokrenuti upravni spor pred Sudom Bosne i Hercegovine u roku od 30 dana od dana prijema, odnosno objave ovog Zaključka.

Predsjednica

Adisa Begić